

# Mari-Lois TRÉGUER

Lazet gant he goaz, Iann-Fanch COUCHOURON

E Pen-ar-Pont, en Irvillac, ar bevar a viz kerzu 1886

Heman a lazaz he vaouez,  
Miz kerzu d'ar bevar devez,  
Mil eiz kant c'houec'h pevar ugent  
Evit roï mad d'e-hoc'h da entent.

He hano Iann-Fanch Couchouron  
Evit he dud e oa eur spont,  
Dre ma dremene peurvua  
ENN davarn he amzer vella.

Marechal 'oa eur vicher vad,  
Pa garer ket re 'r chopinad,  
Mes va den gare ket chom pell  
Kichen ann anne er c'hovel.

Bouzaret vije e ziouskouarn,  
Pa renke skei var ann houarn,  
Ha trouz ar guer, ar boutaillou  
A gar quell evit morzoliou.

He c'hreg Mari-Lois Treguer,  
Oa eur boanouirez a larer :  
Evelze bi a c'hourdrouze,  
Aveachou ann didalve-ze.

Siouaz ! heman a oa eur bleiz  
Ne oa kaloun 'bet enn he greiz,  
Ne gar na greg, na bugale,  
Re zouget ez eo d'he vanne.

En devez-se o tont d'he di,  
Goude bet en hostaleuri,  
He fuzul karget a gemer,  
Gant eun tenn e laz he c'hreg ker.

Azezet oa var ann oalet,  
Ann tenn he chot en deuz treuzet,  
Eno e kouezaz maro mik  
Hep na c'hellaz lavaret grik.

P'en devoa lazet anez-hi,  
He vugale a lak meaz ann ti,  
Ha va den ann or a brennaz  
ENN eur gemmeret hent Daoulas.

Hed ann hent d'ann dud a lare,  
Joaus bras he dorfet neuze :

— « Va boed hirio m'euz gounezet,  
« Gellec m'euz laza va fried ! »

Ti ann archerien e Daoulas,  
Hep nec'h ebet e lavaraz :  
— « Me m'euz hirio paket eur c'had  
« Hag evit-hi a vo paet mad.

« Hed va bue am bo bara,  
« Vo ket dao d'in ober netra,  
« Rak ar c'had-se am euz paket  
« Eova fried am euz lazet. »

Ann archerien geiz a grene  
Klevet kelou ann torset-se :  
Mes ar brutal na grene ket  
Ne oa ne greiz kaloun ebet.

E Lesvarn Kemper, ann testou  
Ho deuz diskuitlet he droiou,  
Lavaret oa eun didalve,  
He c'hreg aliez a ganne.

Meur a veach en devoa klasket  
Laza Mari-Lois, he bried,  
Ha ne doa ket buez eur c'hi  
Gant he goaz Couchouron enn ti.

Barnet d'ar galeou hed he vuez, (1)  
Dre m'en deuz lazet he vaouez,  
Eno velo ann didalve,  
Petric eo karout ar banne.

Nep a zounj d'ezhan kaout bara,  
Er galeou hep ober netra,  
A fazi kalz vont da vesvi  
Ha laza he dud evit mont di.

Dre heg pe a volonté vad,  
Er galeou e renk labourat  
Anez ann dra-se ann dud fall  
'Vit mont di lazfe ar re all.

Evit ar c'heit chommer er ded,  
Arabad laza den ebet.  
Nak enem laza ho-unan,  
Doue hor galvo da 'vit-han.

(1) Barnet d'ar galeou epad he vuez e lesvarn Kemper, 21 a viz ebrel 1887.

# GUERZ AR VESVENTI

TON : Araok ann Taolennou.

653/A

Kanomp brema eur ganaouenn,  
Divar-benn ann holl vesverien,  
Evit ma glevo pep hini  
Ar virionez hep damanti.

Koulskoude me her goar er-vad,  
Am bo out-ho eur goall-grogad,  
Pa 'z int tud sur var ho meno,  
Ann holl dle kemmer skouer out-ho.

Koz ha iaouank, paour, pinvidik,  
Hotuz int dre nerz ho bannik,  
Hag ann dud kreva, gouizieka,  
Enn ho c'hichen ne d-int netra !

Mar d-eo mestr enn he diegez,  
N'euz ket he bar enn he barres ;  
He gezek, he zaout, eme-z-han,  
Zo ar re vella er vro-man.

Pa vez oc'h eva odivi,  
N'euz kear ebet par d'he hini,  
Labouret mad he zouarou  
Ieut keit ha hen enn he brajou.

Epad m'ema o fougeal,  
He dud er gear 'ra troiou fall,  
Hanter amzer labouront ket,  
Kentoc'h ez' aï da glask he vouez.

Bet eo eunn amzer pinvidik,  
Brema nemet gle he gearik,  
N'euz forz enn devez yo guerzet,  
Mezo c'hoaz a vezò guèlet.

He c'hreg hag he vugaligou,  
A vo dizolo ho memprou,  
O klask ho zamm ama-a-hont,  
Dira-z-han greno gant ar spount.

Ann ezec'h troet da vesvi,  
Ema diout-ho stag pep si :  
Evit sellet ouz ar gragez,  
Lezomp anezho a gostez.

Eur c'hreg zo troet da eva,  
Eon he zi a vanko pep tra,  
Eleac'h prena pebr ha hoalen,  
Va gaign a lipa ar veren.

Arc'hant al leaz hag ann amann  
A ia ganthi e guin-ardant ;  
C'hoaz pa vo out-hi goulenet,  
Chann ar zoubenn n'eo ket sallet.

Deac'h m'oа dizounjet ann hoalen,  
Varc'hoaz me z'ai d'ann oferenn,  
Ro d'in unn-ugent real pe zaou,  
Ezomm am euz euz kalz a draou.

Hi devoa eur pez kik kuzet,  
Hag arc'hant oa d'ezhi roet,  
Laouen'ia d'ann ofern-vintin,  
Hed ann hent ra 'met mousc'hoarzin.

Kenta tra 'ra guerza he c'hik,  
Goude ev daou pe d'i bannik,  
Ha pa erruaz enn iliz  
E oar gant hanter ann offis.

Goude ive oa dao monet,  
D'eva gand ar gommerezed  
Ha ne zonj ket e tud he zi,  
N'he bugale deuz em out-hi.

He bugale a zo en noaz,  
A leav en dro d'ar vatez vraz,  
Unan bihan zo er c'havel  
Gand ar zec'ched prest da verval.

« Poent eo d'hoc'h mont d'an ofern-  
« Prenit, matez, ar pez zo red, [bred;  
« Ha digassit va greg d'ar ger,  
« Abalamour d'am bugel ker ! »

Ar vatez, eur gristenez vad,  
A visk buhan he zamm dillad,  
A glev er vorc'h ann oferenn  
Hag a bren holl pebr ba hoalen.

Mont a ra da glask he mestrez,  
ENN hostaleri zo mesvez ;  
Mes mont d'ar gear 'vo ar goassa,  
Pa ne hell mui chom enn he za !

Var bouez paka kalzik lammou,  
Dizec'het eunn tamm ann hentchou,  
Gant he matez oe distlejet  
Da gaout he bugel dideoted !

Kalz gragez a aï drouk enn-ho,  
Ha d'in-me sur a lavaro  
E vez geier ar zon-ma,  
E venn atao klask ho dua.

Guelet am euz meur a hini,  
Eur veach en em roet da vesvi,  
O verza al leaz' ann armann  
Ha laerez ed da gaout arc'hant.

Betek dillac ho bugale,  
A roent evit eur banne,  
Rochet ann ozoc'h zo guerzet,  
Er c'houez' larsent eo kollet !

Guelit klaskerezed bara,  
Petra 'reout da gaout da eva ?  
Lezel gand ann naoun da c'hlouri  
Ho bugaligou enn ho zi !

Aliez 'z eont d'oder korfad,  
Gand aluzennou ann dud vad,  
Mes piou bennak ho zammallo :  
« Zo dek guech falloc'h eme-z-ho. »

Var-n-ezho me ia da devel,  
'Vit komz euz matez ha mevel,  
Rak en ho zouez' a zo ive,  
Hiniennou gar ho banne.

Ar mevel mezo a laver :  
Er barrez-ma n'euz ket ma far  
Na da vedi, na da falc'hat,  
Na gand kezek da charead.

Euz ar foariou, ar pardoniou,  
E zeu d'ar gear a c'hourlammoù ;  
Hag he zillad na vent 'met pri,  
Her c'helever c'hoaz ho fougassi.

Al loened paour da zul, da lun,  
Ouz ann noz aliez renk iun,  
Pa ve mezo ar vevelien  
Ann ezech' chommet er vouullen !

Merc'hed iaouank gemmerit ket  
Evit pried mesvier ebet ;  
Evit-han da gaout arc'hant, aour,  
Etrussoch' vec'h kichen eur paour.

Gand mevel fur n'en deuz netra,  
N'eur labourat ho po bara,  
Eleac'h e kichen eur mesvier,  
Riskl koll ar vuez e vezet.

Potred iaouank koz 've guelet,  
Deut var an oad, o klask ho boued,  
P'ho deuz re garet ar veren,  
En tu all d'ar pez a dleet.

D'ar goazed 'larann kenavo,  
Brema mitisien 'ma ho tro  
Ne gredann ket gavfac'h diez,  
Ma flipatann ar vesvierez.

ENN HO TONEZ ZO MEUR A HINI  
Gar ar c'hafse, arn odivi,  
Hag avechou evont ive,  
Siouaz ! d'ezho, eur bannik re.

Goulskoude m'euz guelet eunn dra,  
Epad ma vent klask fortunia,  
Dirak ar goazed reont chistrou :  
« Ni ne garomp ket ar banneou. »

Padal ma kredfent lavaret :  
« Goazed, bi assoc'h c'hoaz diskennet ;  
« Ni merc'hed, hon euz sec'het braz,  
« A dra laromp ec'h menargaz.

Eur veach evet daou, tri banne,  
Ar re all a ziskenn eaz tre,  
Ar goad a veler zav d'ho fenn,  
A fors da skarza ar veren.

Ar rozera, ar gousperou,  
A ganont brao euz ann toliou,  
N'euz fors diez vo mont d'ar ger  
Guea a ra ho divesker.

Merc'hed iaouank mesvierez,  
Villa tra a c'heller guelet,  
Ho-unan gollont ho brud-vad,  
Enor ho mamm, hini ho zad.

Den ebet sur n'eo eureujo,  
Nemet paotred henvel out-ho,  
Ha guelet 'vo ho bisaichon  
Bronduet dre nerz ann toliou.

Perak ve trous ken aliez,  
Ti ar mesvier, ar vesvierez ?  
Abalamour a vent klask gout  
Piou a evo muia lagout.

Mesvieren ha mesvierez,  
Me n'am euz ket ho tikriet ;  
Rak ann tan-goall ebarz en ti  
A zo guell eget mesventi.

Hi a zoug anu dud da laerez,  
Da laza, d'ober muatrerez,  
Ha mar deo leun ar prizoniou  
Gant-hi ema ann alc'houeziou.

Gouzout a ra kas da glask boued  
Tud pinvidik amzer zo bet,  
Ha gand ann naoun lak da zua  
A vicherourien ar guella.

(*Tous droits réservés.*)

Michans ne vezoo den ebet diskiant aoualc'h evit dont da dammall va c'han-aouenn na da gaout abek enn-oun abalamour d'ezhi.

Kement, den fur a zo a oar eo ar vesventi eunn tech fall, eur pleg divalo tre. Netra ebet kaeroc'h, eget guelet eunn den iaouank, evit eur pardon pe eunn eured bennak guisket ker brao, henvel eo euz eur boked ros digoret ouz ar mintin. Hogen mar teu da eva re, e c'hoarvez ganthan egiz gant ar boked ; goenví a ra, stoui a ra he benn, mezuz eo brema guelet anezgan, mezo eo !

Ar c'hlaouren a zeu ouz he c'hinou, he zaoulagad a zo ruz enn he benn, he zivesker a bleg didaon han, koueza a ra er pri, saotra a ra he zillad.

Eur vaouez vezoo a zo c'hoaz mezuzoc'h he guelet ; guelit anezhi ; prest, pe gollet gant-hi he c'hoef, he bleo enn he daoulagad o vont a dreuz gand ann hent da c'hortoz ma kouezo enn eur poull bennag.

Poan a rafe d'in, mar klevfenn unan bennak o lavaret ne blij ket d'ezhan ar verz-ma, abalamour ma sko var fri ar vesvieren hag ar vesvierezed.

Gouzout a rann hini iaouankiz Kemper, na blij ket d'ann holl ; koulskoude hounnez a zo ive enep ar vesventi, kouls hag hini ar Bigoudenned. Divar benn hou-ma am euz paket flipadou betek digand beleien. Digant ar Bigoudenned hag ho goazed honest, e c'houlennann trugarez. Mes n'ann digant ann everezed hag ann everien.

Mar karfe ann holl chomm hep mesvi, den ebet na skrife enep ar vesventi. Na ve ket guelet kement a dud o klask ho boued, na kement a dud o vont d'ar prizoniou.

Ar vesventi eo hent ar visou, bent ann dizurziou.

En hano Doue, tud iaouank va bro, tec'hit pell ouz ar vesvieren.

Na lezit ket ar vesventi da bilat ac'hanc'h.

N'eo ket difennet eva eur banne.

Arabad mörse mont enn tu ell d'hon nerz.

MIKEAL QUÉINEC.